


姑溪居士全集

一







姑溪居士全集

(一)

李之儀撰

姑溪居士文集序

李公端叔以詞翰著名元祐間。余始得其尺牘。頗愛其言思清婉。有晉宋人風味。恨未覩他製也。乾道丁亥。假守當塗。因訪古來名士居此邦而卓然有聲於世者。惟李太白、郭功父、與端叔三人。郡舊有太白、功父、集。而端叔獨闕。然求於其家。而子孫往往散落。無復遺稿。間得之邦人。類而聚之。命郡士載鞏訂正。釐爲五十卷。鈐板於學。昔二蘇於文章少許可。尤稱重端叔。殆與黃魯直、晁無咎、張文潛、秦少游輩。頡頏於時。今觀其文。信可知已。或謂端叔晚節銳於進取。有所附麗。雖若可疑。然范忠宣公遺奏。極於鯁切。詆斥不顧一時用事者。欲寘忠宣之子於理。端叔慨然自列。謂實出其手。旣而公所爲忠宣行狀復出。由是得罪。南遷廢錮終身。曾不少悔。其勇於義若此。詎可以微瑕掩之哉。余固愛其文。又表其行誼之可嘉者。併以詔於後。雲端叔名之儀。其先景城人。旣謫而南。始居姑溪。自號姑溪居士。今以名其集。天台吳芾序。

姑溪居士文集上卷目錄

卷第一

古賦

閒居賦

古詩一

謁李太白祠

梅花詩四首

次韻君俞見寄

題步雲亭

題渭濱亭

題山堂

送儲子椿

贈報甯老

和郭功甫遊采石

捉月亭

賞詠亭

鑑然亭

卷第二

古詩二

題道遙閣

送芝老

題王德循書院

胡伯鎮石菖蒲

丁德孺置酒

贈劉九思

題孝嚴亭

次韻處度二首

次韻君俞見過

迎暉閣

和遊一人泉

秀遠堂

中隱菴

莊居十小詩

卷第三

古詩三歌行附

楊子儀虎圖

送人一首

書長干僧房

和人雪意

和人感懷

東坡雪浪石

甘露堂歌

琵琶歌

雷塘行

卷第四

律詩一七首

讀吳思道詩

東坡雪浪石

次韻東坡

寄邵暘叔

東坡沉香石

送曾端伯

濟上閒居

告別子通

和子椿竹二首

和子椿七夕

題蘭皐

戲子微

題譽老小軒

齋僧值雪

送宣上人

遊白雲寺

題白紵山

寄丁希韓

再領玉局

次韻葛大川

吉甫第雙檜

題張浩然壁

答李去言

懷珪元白

儲子椿作別

次韻子椿

又次韻子椿

遊雨花臺

次韻子椿莊居

卷第五

律詩二七言

用聖行韻

和人見寄二首

澄虛堂

和子椿

莊居寄友人

和友人見寄三首

懷舊二首

送人入館閣

邂逅故人二首

金陵懷古二首

和人見寄

邯鄲叢臺

久雨次韻君俞

次韻付俞瑞香

次韻君俞四首

堤上閒步二首

韋深道寄傲軒

次韻君俞六首

觀東坡集

卷第六

律詩三七言

次人字韻二首

再次韻簡少孫

次韻雪

長春閣

後圃

子椿野軒

逃暑過君俞

歸自錢塘

贈榮天和

邂逅劉君

伯鎮傷春

夾竹桃花

次韻聞笛

贈陳待制二首

和人三首

次韻探蓮三首

次韻子椿述懷

次韻早秋

次韻子椿

陪曾延之泛舟

宿太乘

卷第七

律詩四七言 五言

賞心亭

城南張氏園

偶書二首

贈人

兩翁軒

次韻珪首座

錦繡亭

同思道宿崇因二首

寄僧

思道橫翠堂

簡劉君秉

夢趙仲強

水中登月閣

勉王德循

遊禪岳

藏雲山居二首

山居夏日

誠上人

宿青山坊

黃池道中

次韻俞希賢

卷第八

律詩五五言

和答友人二首

食笋二首

謝陳無已相訪

北觀

回酒

長干僧房

無題三首

自然庵

湯泉道中

雨中過明覺

宿滴水庵

夜行鞏洛道上

題李欽之宅

離宣城

秋日遊青山二首

過西莊

遊石城

謝人送魚

題齊雲亭

賀時相生辰

卷第九

絕句一七言

次韻范景仁二首

次韻景仁西還

又次韻

柏臺自述四首

西莊久雨

路西莊絕句

宿采石

寄梅道者



偶書二首

瑞竹三絕

書扇

立秋日書扇

題郭熙畫扇二首

又書扇

畫夫子扇

題畫扇二首

莊上書事

訪僧不遇

天甯卽事

學古堂

題于子高宅

俞秀老詩卷

寫裙帶

采石二首

浴南寺

源上人硯

訪臻山主不遇

次韻章深道五首

次韻東坡梅十絕

贈呂煥

卷第十

絕句二七言

舟泊采石

曾延之置酒

當利樓勸酒

書延之扇

延之置酒南園

何子溫家

書延之侍人裙帶

謝延之館置

口占呈延之

雜詠四絕

書龔彥本莊壁

同彥本泛舟

書彥本隣莊屏

龔深之遺像

初八褒禪山

答褒禪知客

褒禪齋後獨出

遊華陽洞

大乘路中

寄祖登禪師

晚過大乘

呈湯泉長老

苦竹寺後亭

再過苦竹寺

絕句七首

和張文潛

宿觀音寺三絕

謝范守惠鵝

畫鴨

畫鵝兒

畫鵝

卷第十一

絕句三七言 六言 五言

書羅氏屏風

謝荊州太守酒

題隱者壁

題漁家壁

偶題六絕

訪璿上人

七夕

東山

閑坐

登月閣

遊洪福二首

遊石城

謁錢公振

憶李希武

金影軒

題黃檗泉

次韻贈答洪覺範

題畫扇

挽詞

東坡輓詞

石敏若輓詞

李希武輓詞

濮道甫輓詞二首

姑溪居士文集 上卷 目錄

功父妻輓詞

李府君輓詞

弔王承議二首

姑溪居士文集卷第一

趙郡李之儀端叔撰

古賦

閒居賦

嗚呼。閒居之爲樂也。樂其所可樂也。樂非其可樂。不爲閒居也。樂其居之閒。然後知閒居之爲可樂也。迹雖是而心不在焉。與夫故爲其迹。而資以藉口者。乃閒居之戮民。非樂閒居者也。樂其樂者。君子之樂也。未始知其樂。而盜有其名者。小人之樂也。潘岳之賦。名則是矣。而心則不閒也。失志自寓。其無可奈何。而形容其不得已者也。戮民不足以言之也。陶淵明歸去來。似無頃刻休息。而超然自放於造物之外。陶然自得於言意之表。居不閒而得閒居之樂也。有一念不爲閒。有一境界不爲居。形如槁木。心如死灰。尸居而龍見。雷聲而淵默。得其一未知其二也。終日言而未嘗言。終日行而未嘗行。其庶幾乎孔子居鄉黨。似不能言者。其言曰。毋意。毋必。毋固。毋我。又曰。予欲無言。又曰。吾與回言。終日不違。如愚。申申如也。天天如也。纍纍然如喪家之犬也。魯人則曰。此東家丘耳。夫是謂之閒居。而樂不足以言之也。漢儒所記閒居。燕居。是其日用之常。而非其所得之樂也。惟彼不類。造次必僞。於以行已。狼藉自棄。蒙不潔而反以銜鬻。蹈荆棘而不知所避。務淺陋之爲夸。而不識人間有羞恥事。方且忽婁豬艾緞之歌。而擁宋朝之敝帚。安燕

婉籛條之刺。而歸河水而高峙。杜門卻掃。而閭里坐視其左右。動容變色。而肉食率懷其可畏。一顰一笑。惟我之從。則言發而利害隨之。一動一靜。立我之異。則頤指而百罹斯值。以是而日輸月賦。如征焉。以是而山積海納。如歸焉。乃曰。我閒居者也。是又潘岳之罪人。而謂聖日在上。爲可免。則予不知其所以也。

古詩一

謁李太白祠

愛君獨酌板橋句。想君不向嵇山時。千載風流同一轍。孤墳數尺埋蒿藜。文章誤人豈當日。聲名雖好終何爲。譬之花卉自開落。又如時鳥啼高低。行吟漫葬江魚腹。鵬來空賦予何之。君不見吾腰恥爲小兒折。或車或棹聊爲期。又不見羸顛劉蹶不到耳。探花摘實相維持。春寒漠漠青山路。厚顏已覺歸來遲。一塵尙冀容此老。與君朽骨分東西。

累日氣候差暖。梅花輒已弄色。聊課童僕。芟削培灌。以助其發。戲成小詩。

京洛三十年作客。每見梅花欲忘食。時時魂夢到江南。足跡塵埃來不得。嗅香嚼蕊不忍捨。爲憐絕韻真顏色。誰知晚得江南身。特此一株當舍北。寒根老枿初不辨。幾與桑榆同棄擲。殷勤地主故指示。頓覺翛然超眼域。幾山氣候也深春。戢戢枝頭危欲折。呼奴隣家借刀斧。穿斷因之聊拂拭。便宜邀月作嘉賓。不惜淋漓慰疇昔。邂逅梅花同作客。此理雖龜亦難食。道人無眼自超羣。定裏觀之想應得。爲惜花開將及時。枕上朝朝問天色。自是春工力尙堅。一向風頭來自北。昨夜雪深幾一尺。不覺起來欲跳擲。雪過春回

固可期。聊與此花爲畛域。今朝舉頭消息別。物理人情原未拆。綠萼柔條宛相契。正色眞香淨如拭。更煩妙語爲詮評。莫遣塵根迷夙昔。花是主人身是客。更欲花前羅酒食。花應笑我強相親。畢竟人花誰是得。金樽到手我自醉。道人何妨且觀色。三界觀來卽是空。醉裏甯知漸遊北。等爲圓鏡隨身現。認着分明却虛擲。持此問花花不答。嗟我與君徒入域。不如收卻閉眼坐。萬境紛紛任披拆。一番風雨使紛飛。念垢情塵漫磨拭。今年春盡有明年。花落花開幾今昔。

彥行和梅詩甚工輒次元韻

春風不揀尊前客。未必藜羹輸肉食。玲瓏點綴移月窟。誰謂吾家最先得。直從去臘約爲伴。旦旦相看無倦色。朝披日彩爛迎東。夜插斗杓寒挂北。擬將西子作孤注。對與春工分一擲。又疑妖冶瀆清真。子細籌量信難域。發狂不意落紙上。勝句爭來共推拆。諸郎獨殿語尤老。似欲塵埃劇滿拭。不惟詩社頓光輝。枝上分明過於昔。

次韻君俞病中見寄

老眼逢春如有隔。不覺花前手頻拭。昔陪韋杜尺五天。此地去天今幾尺。東家有客貪春甚。酒作衾裯花作枕。瘦逼休文臂漸消。渴近相如尤齷飲。賞心直以花爲命。醉頭只恐扶難正。春歸每恨太忙生。不惜一春常似病。我老無用終安之。屢欲從君獨較遲。方將結束窮勝致。投懽祇許春相知。詩來苦訴不自樂。春固惱人多索寞。何妨強襲起應劉。問促扁舟尋李郭。君不見樂羊功名方燿燿。歸來謗書已盈篋。爭如隨

地任低昂。漫浪猗汗盡元結。

題步雲亭

昨夜風高蟬半咽。起來知是白露節。玉面少年窄袖衫。袖裏新詩似冰雪。幾日炎炎如甑中。今朝忽覺超樊籠。不惟氣候已八月。更得冰雪開心胸。謝公山人詩筆奇。問君何緣得此詩。報我我欲步雲去。山人許我因留題。君作斯亭幾許高。擬推皓魄灑銀濤。誰謂姮娥落君手。坐遣山人詩思勞。君不見梅老句出天地窄。曾謂山人真太白。采石月下憶相逢。笑披錦袍弄明月。十年明月歸謫仙。姮娥豈得在君邊。何妨邀取山人去。卒歲扶攜醉笑間。

題涓濱亭

廣張三千六百鈞。太公欲與文王親。文王不爲熊羆獵。卜年七百終何人。開元天子降步輦。當日何如涓濱見。是同是異不可詰。一等風雲符虎變。吾君好賢軼前古。處處鷄鸞刷修羽。觀君命意非苟然。他日風流須再覩。

題山堂

二年江南客。對面不見山。負我愛山心。兀兀塵埃間。一聞說山心。便喜欲插修翰邊。飛起君家乃是山中居。永日青山同徙倚。流泉涓涓薜蘿暗。明月時時窺枕簟。三伏清霜帶雪來。不斷煙雲擁欄檻。只恐居山興易闌。萬壑波濤翻等閑。知有心期難得否。憑君借與畫圖看。

送儲子椿參假太學時泊舟金陵風亭

金陵二月春。江上連日雨。暖風初報一番晴。綠淺紅深行可數。與君已是隔年別。相逢又作臨分語。感君情重故可歌。送君心折不成舞。五年相從如一日。物物講評窮髮縷。愛君正如講上鷹。畏君何翅文中虎。未飯已知必下趙。憑軾會觀終報楚。逡巡照眼綠袍新。更約十分同一舉。

走筆贈報甯老

半山老人筆如椽。落筆直欲擊雲烟。東亭右軍不復見。龍跳虎臥誰爭先。姑溪六月汗流水。邂逅清風頓如洗。他時問法到山前。應許神光得吾髓。

和郭功甫遊采石

卒歲悵悵無地雪。三首新詩報明發。使君近作采石遊。勝踐傳聞驚久缺。元陽便有欲雪意。和氣先期振巖穴。想見旌旗錦繡張。如從元君朝北闕。後攜一老何奇哉。朱顏鶴髮超塵埃。噉呼江水來席上。延邈萬古隨雲開。騎鯨仙人不敢避。玉鏡台郎俄復迴。分明月下遇賞嘆。將軍斷自天邊來。逡巡落筆轟春雷。落花亂點荒池臺。沉埋秦莽見一旦。名高此地直當才。從來不許說前輩。寄聲魚鳥休驚猜。直疑乘槎叩月窟。又若登臨望天臺。酒行已徹更須酌。醉倒甯辭無算杯。卓然一段極快事。遣我擊節因誰催。

采石三題

捉月亭李太白

我昔揚帆下廬阜。落帆采石春欲暮。江南江北只見山。欲識錦袍無問處。夜深明月來青天。天水茫茫月連霧。想見扁舟捉月時。江心見月如相遇。醉魂不制月可捉。捉得便將天外去。月在人亡天莫詰。髣髴風流誰與晤。邇來水落洲渚出。隔岸潮迴疑可步。聒耳啁啾不得聞。對案腥臊難下筯。多情禪客饒佳趣。粉飾餘光扶墜緒。欲回古月換今人。到此翛然忘世慮。從來喜誦騎鯨句。亦復買田相近住。會當載酒十分圓。同指虛無問征路。

賞詠亭袁彥伯

爨下得餘薪。便可歌南風。參差長路鐸。鼓樂俄相同。一棄一流落。悠然會天工。始知盛衰際。遇與不遇中。風清月正好。爽晤聊從容。豈意接心期。賞歎如雲龍。千載瞬息爾。轉盼歸虛空。何適非適然。神交付冥鴻。

鑑然亭太真

溫公天下士。百計興艱危。大廈勢已傾。意欲一木支。功名等山岳。德澤均雨露。奈何談笑間。而取鬼神怒。鬼神豈不鑒。忠義當扶持。一見亦何傷。冥路俄相期。似非理所安。端恐數應盡。邂逅不可逃。紛紛遂爲信。孔子昔有言。既敬亦須遠。三復而三思。臨風更三歎。

姑溪居士文集卷第二

古詩二

七言古風寄題薛公尉氏逍遙閣兼送伯成知縣宣德解印當塗直書民言耳非所謂詩也

長身少髯復多骨。憶在兒時獲相識。滿朝善類推老成。鄉曲名流誦才德。邇來契闊四十年。停鸞峙鵠欣相傳。我方却歸不自得。但覺和氣如春天。先日朝門炙可熱。今朝吏爨幾無烟。追呼輩伍殆千指。一旦束手蠹如眠。父老相傳語且泣。岌岌流離遽安集。省事以來無此君。豫恐他時莫能及。尺紙胡爲來北闕。樂境危城俄見歿。覆盆雖光亦慙爾。所惜時間未能雪。稍傳遠近或歎喜。歎者吾民喜者吏。吏至酌酒更相賀。畢竟卷舒須在我。父老沾襟嗟薄福。此理冥冥定誰坐。異時得君逾所聞。杳杳健鶻盤霜旻。信矣此地不可久。空使遺愛傳邦人。邦人姑止聽我語。逍遙閣去天尺五。長身仙翁昔遊戲。日日烟雲泛罇俎。仙翁久已朝紫皇。功行不泯鍾諸郎。扶疎密蔭被所至。遂令此閣如甘棠。我昔西畿數來往。日御闌干猶可想。塵埃滿地阻登臨。白髮心期負眞賞。六月炎炎汗如洗。江南雨多拍隄水。旗開鼓響船欲發。超然爽意因君起。驂騑一跌愈莫止。大鵬會展滄溟翅。何妨閣下敞高門。更看陰功動閭里。

送芝老

江頭春色已可掬。風雨惱人常不足。筆力俱來紙上春。壻外落紅爭蔌蔌。忽然別我下廬山。蓮社風流指

顧間爲我寄聲陶五柳。少留住處共追攀。

題王德循書院壁謝韓君錫小會

熱不就惡木枝。渴不飲盜泉水。古人不可期。歲月姑相委。不愛爾井泉百尺深。不愛爾庭樹千里陰。相看豈計一飯報。長嘯聊爲猛虎吟。

近得石菖蒲。胡伯鎮見之。謂必以錦石資藉。乃可以久。遽輟所有爲贈。仍枉佳句。輒次韻奉謝。倒屣得小異。不言四時備。遺我百明珠。書窗遽增氣。石盤叢秀轉光輝。攜挈衰慵絕塵世。更煩藻思元維持。紙上盤中盡珍珠。他時相對擘麟脯。何必方平爲紹介。

丁繼孺置酒。適與陳君俞聯坐。聊賦小詩爲君俞謝。因以贖先起之罪。春風不解事。吼地如雷霆。誰知一席間。笑語燈熒熒。至人意彌敦。設置不少停。而我槁木然。感慨時自驚。多情接勝友。孤朗如初星。微吟間相警。似欲慰獨醒。我老百不堪。已分如漂萍。邂逅因事樂。尙或有此形。不慙引去先。得意耳暫清。展轉尋斷夢。間關媿微生。何當萬里浪。相與同滄溟。

贈劉九思山人

我行亦偶然。君來定何謂。風高浪如山。聞者亦已畏。而君從一葉。過我乃特地。郵亭六日俱。臨別尤自媿。朝出纔辨色。夜歸或霑醉。殘燈不見人。待我獨忽睡。語款多破顏。情極幾屑涕。屈指再相從。使作新年計。我擔旣弛肩。君駕亦方稅。不覺涉四年。俛仰纔一喟。每見意每加。終始不少替。顧匪求名頑。豈不懷此義。

凡生等飄蓬。何物非委蛻。爲我謝故人。隨方聊自慰。

題繁川徐氏孝嚴亭

樂樂欲報恩。歲月猶過隙。常恐寸草暉。終負陽和力。萬鍾非所養。所重在以色。庶幾參與鶩。不獨慕今昔。千尋用或短。乃未及咫尺。哀哉過隙心。泪盡墳草碧。坐見食亦覩。幽明固無隔。蒸嘗雖其時。要是未爲得。詩書聖人事。力久真自積。卷舒豈他人。忠孝均我職。尙容表龜趺。過者必此式。長江會生塵。德輝何可極。

次韻秦處度同登黃山

艱生縲紲餘。特爾脫魍魅。殊方遠飄蓬。未免游戲事。眼力到毛髮。抉剔盡奇祕。邂逅平生歡。笑語當歌吹。曲環豈人謀。明滅殆天使。慰我雲煙期。有覩鴻鵠志。百年一瞬爾。幸此半日地。聊據廣莫心。無作雍門淚。處度再和前詩見寄。復次韻報之。頃有所約。今不逮。悲愴無已。題於褒禪方丈。

愛山平生心。殆若鬼所魅。茲遊媿不早。危至失吾事。佳辰秋正晴。有物不自祕。晶瑩麗初陽。浮動薦微吹。幅巾方袍接。固可稱傲吏。躋攀敢惜力。卜築豈無志。稽首定光明。願借一席地。何在眼中人。不覺衣上淚。次韻陳君俞攜酒見過

野人欣莫逆。君子戒多上。幸爾違朝市。聊復圖蕙帳。薄田幾負郭。山水分背向。巾車俯秋成。舒嘯會隨仗。吾友真可人。輕舟數相訪。投懷失枯槁。達意信搖蕩。時哉固難得。觸境沉波浪。謂我來歲寒。種種不少創。杯盤挽氣類。論辨極氣量。敢辭屢舉白。自喜老彌壯。回頭易陳迹。傾倒可惆悵。樂事須勉旃。何適非醞釀。

迎暉閣

霜風吹我衣。日短歸路長。放懷即可家。何適非吾鄉。稍聞東南隅。勝致寓一方。超然世外人。雞黍隨低昂。簷甍闢無際。戶牖延初光。孰云日月久。但知歲時康。每逢會心處。萬境不得藏。何當駕修翰。飛雲共回翔。淋漓非所期。遠目聊徜徉。庶幾蟹眼白。打出鵝兒黃。張君好藏茶。多能識上人。歲入貢。必迂路。以致其新。故名聞江上。

和遊一人泉

新詩解人頤。秀若披雲鬢。突然不可揖。平地翻波瀾。褰衣媿招攜。每見輒汗顏。恐茲天際遊。物理知難攀。一來金陵居。終歲不得閒。勝踐因疇昔。欲往獨見刪。命駕等人爾。底事獨我慳。豈非勒移靈。不許汚名山。因詩想其愛。回來直仍彎。裂臍那復惜。頓足已滯頑。清甘似可飽。急遽誰其還。何當強扶老。寄迹雲霞間。要須君意果。莫遣我盟寒。晚來雨脚斷。去夢已班班。

秀遠堂次趙德孺韻

韓君錫起秀遠堂。結中隱菴。趙太傅德孺賦秀遠堂詩云。翰林李謫仙。埋骨青山下。平生愛此山。老去終不捨。放逐鷓鴣行。追隨雞黍社。文采今尙存。英風滿松檜。寥寥五百年。好尙世所寡。韓子荊州後。爲裘襲良冶。乃祖當時輩。異代同瀟灑。結堂山之陽。真趣非少假。秀色來天外。遠勢包平野。烟嵐浮翠黛。攬之不容把。徜徉盤谷遊。屢請秣吾馬。時無謫仙人。登臨誰賦者。九原如可作。一奠招魂罌。

愛山依山住。如山不少下。山中所有多。惟取不容捨。烟雲實交遊。松竹乃保社。尙欠目所窮。披翦甯同檜。

廓然宇宙寬。信矣和無寡。隱隱徹四垂。萬象入坯冶。初疑彩間錯。又若墨勻灑。造化非適然。一二類見假。吾友端可人。韻勝不少野。更將桃李俱。參差移拱把。時哉須自勉。歲月甚奔馬。得難未易失。詎有長年者。何妨倒載歸。日日無虛罨。

中隱菴次趙德孺韻

德孺中隱菴詩云。在昔避世賢。隱居豈自喜。甘守西山餓。清沈潁陽耳。一旦事高尚。萬古激貪鄙。孰謂樂山林。便可輕朝市。竊笑效顰人。不知捧心美。安將凡庸姿。敢希明哲軌。盜此嘉遯名。紛若干時子。仕塗指捷徑。矯僞汙青史。聖朝揚側陋。采錄無遐邇。不遺下體葑。況乃中鄉芑。多士生此時。貧且賤焉恥。夢自傅巖來。獵從渭濱起。隱居聞此風。翻然烏可已。聊爲知者道。庶達名菴旨。

退之以文鳴。詩友得侯喜。聲名力與俱。雖尊未湧耳。潢池詎青山。孰辨都與鄙。菴成誰振之。句出闢如市。千仞甯我高。充實信我美。坐令菴內人。前車云可軌。禮樂有先後。後進則君子。執方而昧圓。俱野那復史。伐柯固執柯。疇克求諸邇。蒸之既匪薪。采焉又非芑。近交韓與侯。步驟亦常恥。一醫消息盡。布毛自何起。要須六月息。不息不爲已。敢問二詩人。如何得意旨。

莊居值雨偶得十首示秦處度

累日雨不止。風高如作寒。三分雖過二。忽忽便向闌。一身百髮集。況可計先權。不見是無悶。念此聊自寬。滿眼都是水。歲事從可知。早時謂有餘。今空未免饑。一雨又三日。見者皆攢眉。天作人承之。到此終何爲。

我雖非故侯。通籍三十年。孰不夷險半。而我終歲難。念非跣弗視。不覺乘波瀾。餘生豈所期。我君信如天。平生三四友。一人中英。況逢不世主。唾手可太平。參差十年間。契闊而死生。相見復何語。但有淚如傾。死生固可嗟。一譎輒不返。君恩非不深。奈爾道路遠。反初不忍歌。折臂信能遣。已矣何足論。幸子真入眼。念我宜州兄。見時論弟昆。詩書固分路。翰墨俄同門。人雖不歸來。獨沾死後恩。萬里一銘旌。猶能葬家原。多卽天下士。異同親見之。欲掩不可得。交口終何爲。百汰剛愈精。魍魅今尙疑。浮雲空去來。皎皎端所期。不返故鄉義。何妨陸子居。昔游既有約。是豈人所圖。我嘗邀此卜。踏蹬不自如。憑將一掬淚。聊寄夜台書。向晚風斗轉。場上稻已芽。問雨何薄相。偏來戲吾家。蟋蟀床下吟。原原原原戒寒謂稍疎。行矣逢此嗟。競爽聯夜光。一個乃明月。吾友不可見。賴爾相怡悅。蒹葭空非倚。聲聞乃不輟。啜菽安暮年。足以原原絕。

姑溪居士文集卷第三

古詩三 歌行附

題楊子儀虎圖

秋陰報初寒。慘慘日遼晚。有客自宣城。明爽叩昏懶。手持兩巨軸。六幅從而展。披圖畫如生。竟軸詩盡選。平生說包鼎。今日真到眼。何止辨駟驪。于焉識淄澠。愛之不能已。欲挂恨壁短。猶冀逢他時。更疑探深遠。

送人

冥冥天邊鴻。蕩蕩風中雲。一笑偶相逢。擊節聊送君。我室豈無酒。胡爲不開罇。所貴樂文字。固非異蕕薰。天門直牛渚。南北如相文。想君月下吟。未厭俚曲聞。霜空夜自明。江月寒微昏。會當借餘鯨。永謝五濁渾。

書長干僧房

昨日方得書。經年不相見。書來必累幅。分明如見面。雖同雨千花。略不通一線。誰云非吉祥。便是金毛現。

和人雪意

雪意與春約。野情因物裁。輒將無窮思。聊濟有限才。雲容忽破碎。山色如招回。攜持固夙昔。端爲此際來。歲晚君羈旅。微君誰我陪。祇恐造化工。特地吹葭灰。一剖不復收。寂爾爲之胚。戢戢競秀發。翩翩絕嫌猜。恍然徙倚間。浩蕩心胸開。境界適何許。次第分隅隈。高足超日觀。塗如下離堆。四顧始無間。忽覺驚初雷。

有形均難悉。無物非蒿萊。却應求仙原。失路迷天台。波臣復笑屈。市門徒德梅。庶幾未始得。掇拾同舉杯。攘袂卽千古。一醉姑相媒。

和人感懷

高山在平地。高山地焉知。明珠出深淵。明珠淵豈期。高明在人原。要須其時。物理固如此。了不差毫釐。原。缺缺端自窘。歲月相奔馳。所以得黽勉。吾人惟能詩。我非知詩者。平昔竊好之。每出每可愧。未易皆墳箴。而君不我鄙。論極牙解頤。六年如一日。不取笑則疑。彼烏足爲計。有類甯同嗤。一朝原。召命閩里增光輝。不曰人可賢。但從外物移。我賢君亦賢。誰能窮是非。我欲挽君留。留君竟何爲。聊作感慨別。肯效兒女悲。陳人不自信。流品須維持。誰謂廊廟姿。如我品乃宜。江充與丙吉。厚薄惟異施。其後七葉貂。陰功終表儀。是等代不乏。浪爾分騶驪。時哉君何失。儀鳳方臨池。爲我寄聲謝。擊壤正自嬉。勉旃夔龍事。廣載冀勿隳。立賢本無方。莫爲陳言欺。

次韻東坡所和滕希靖雪浪石詩古律各一律詩見後卷

風波末路方奔屯。屹然不動誰如尊。豈知胸中皦十日。顧眎不接無重昏。東觀海市俛弱水。南登赤壁凌江村。斯文未喪天豈遠。出沒狐鼠徙千門。綸巾羽扇晚自得。已聞漠北幾亡魂。由來妙趣入造化。地靈特出雲濤根。生平到處若再歷。隱隱似有屐齒痕。玻璃鏡裏萬象發。金粟堂中千偈論。會須白玉漱寒水。更借落月傾金盤。咄嗟菱溪成底物。混沌空夸竅鑿存。

甘露堂歌

炎天熇熇如湧湯。使君置酒甘露堂。無風但覺冷徹骨。坐來彷彿飛青霜。使君顧客指新榜。天假此應來
輝光。八十里叟感盛事。獻頌請名相激昂。我非取專已上報。堯仁舜智方當陽。邇來瑞應發處處。中台第
一彤雲章。吾邦雖僻亦影響。明德所祐真無疆。已而轉眄欲受簡。慙非叟比疇能當。輒因勝遇強僂俛。庶
幾擊壤同揄揚。吾君之澤不可象。使君之惠何可忘。才高名重偶暫屈。遺愛他日逾甘棠。嗟子落莫徒自
感。乍鳴乍已如寒螿。安時逐境姑委化。隨緣致力聊爲鄉。時逢載酒問難字。未擬持筮操羣羊。但知今日
不易得。縱不能飲須空觴。

白鈴轄席上琵琶

青海傳烽沙遶塞。謀將囊戈身不介。却攜紅袖弄烟月。醉笑溪山窮物外。文章聲名家世事。投筆收功無
十載。天子幾嗟相見晚。暫許南來聊曠快。一時賓客多可人。坐令五月如深春。畫棟潭潭簾半卷。濛濛香
霧無纖塵。雲披霞散爛紅綠。滉漾無處投精神。秦樓風輕雁初泊。玉指如流乍前却。捍撥當胸拍屢催。一
段風光來濩索。雖無儀鳳與舞獸。擊拊分明諧振躍。緱嶺排空午夜涼。杳杳鸞吟上寥廓。逡巡舞袖迴飛
雪。紅茸氎襯鴉頭襪。落花飛絮互繽紛。流星掣電爭明滅。主人情不已。下客歡正濃。更邀姬媼持金鍾。從
來酒戶落人後。漱灑不覺隨手空。金張燕接平生慣。照眼今朝真未見。敢辭醉倒菊化偏。只恐銀潢低曉
箭。鈞天一夢固依稀。欲問桃源路已迷。何時再到紅茸地。更遣游絲惹住伊。

雷塘行

鞭長不能及馬腹。有限生涯時苦促。空使後人悲後人。雷塘春草年年綠。誰知秀色若可餐。風光付與初
凭肩。力殫四海笑未已。眉黛一螺當幾錢。君不見黃金棟梁回首蠹。漠漠胡沙青塚暮。玄絃欲斷空自知。
千金漫買長門賦。膏油續盡天須曉。石土餘壘可長保。就令并蒂永不分。也應終恨雷塘草。

姑溪居士文集卷第四

律詩一

讀吳思道藏海詩集傲其體

唐末詩人自一家。剪裁風月間鶯花。憑陵墜緒篇篇勝。點綴餘妍字字斜。遠水連天來怨笛。烟霞烘日帶樓鴉。法書警句真如此。流落槍榆重歎嗟。

次韻東坡和滕希靖雪浪石詩

古詩見前卷

平生所願識荊州。別乘還容接勝流。異日奔騰驚海面。新詩清絕似槎頭。常嗟盛事千年隔。誰謂餘光一日收。便覺詩源得三昧。日中無復有全牛。

次韻東坡還自嶺南

憑陵歲月固難堪。食糲多來味却甘。時雨纔聞徧中外。臥龍相繼起東南。天邊鶴駕瞻仙袂。雲裏詩牋帶海嵐。重見門生應不識。雪髯霜鬢兩鬢鬔。

寄邵陽叔發運

德門平昔仰高陽。自是芝蘭根本香。未許藩籬承妙晤。聊因文字借餘光。蟻舟月下逢桓守。盤馬樓前見庾郎。冬杪相期定如約。爲君雲影認鸞皇。

次韻東坡沉香石詩

海南枯朽插天長。歲久峯巒帶蘚蒼。變化那知斲山骨。儀型兀只在人腸。幾因皦日疑鑄蠟。試沃清泉覺弄香。折莫輕珉忘什襲。須防偷眼誤摧剛。

送曾端伯之官濟北

貂蟬七葉想前人。四世三公表一門。虎步龍驤推贊冊。瑤環瑜珥見旁孫。琅琅廟器真無敵。袞袞淮流信有源。敵帚不堪終舊物。吐茵行欲奉餘尊。

濟上閒居

閉閣焚香萬慮澄。莫云身似打包僧。功名了未榮三事。理性容先契一燈。丹灶鶴歸休炷火。茶甌客訪旋敲冰。倦來却有登臨興。上徹層樓最上層。

告別子通

之儀早從粹翁子。權遊於門下。實爲舊物也。而子通之賢。蓋願見者。非一朝夕。于是踰月。旣蒙分榻延挹。又獲旦暮親炙。告別遽有期。懷戀不能已。小詩以致感遇。

謝庭蘭玉舊聞名。早歲風流接二兄。白璧無瑕尊士望。青雲有路藹鄉評。簞瓢弗改真天樂。簪紱相高半學生。授館不爲經宿去。心知黃憲異袁閔。

和儲子椿竹

何物能令意灑然。陰森常對出簷竿。排檜立戟誰爲況。招月吟風好細看。幾度驚回窗下夢。新來添得雨中寒。傷心不見東坡老。縱有鵝溪下筆難。楚楚相親豈偶然。依依隨處自成竿。因應表見風塵外。莫作尋常草木看。好事借名真有謂。多言雖巧不能寒。相思乍可食無肉。一日無君恰似難。

和子椿七夕

何用封侯曲似鉤。且將膚寸等岑樓。佳時未用傾河鼓。爽氣先期勝蓍收。月彩正迷千古恨。雨聲還助五更愁。王孫賞詠原無敵。又見詩中第一流。

題蘭皋

萬綠交陰別有天。艤舟重到尙依然。回頭白髮三千丈。倒指青編二十年。賞詠未論臺閣舊。維持今見子孫賢。何當原原披陳迹。再把重衾託醉眠。

戲子微兼次韻陳君俞寄題蘭皋

和風暖日作霜天。冰雪相投豈偶然。特枉新詩詠塵迹。便同佳趣賞當年。學優曼倩三冬足。才過荊州十部賢。爲問醉衾應好在。莫教癡望似鴛眠。

題警老小軒

高步毗廬頂上。身旋開窗牖外。風塵石菖蒲是從來友。龍焙茶爲近日親。不見同行木上座。常留伴睡竹

夫人艱難歷盡無餘事。問佛方知有此因。

因過墳山齋僧值雪遂賦小詩

霜露悲傷老益增。輒憑精意託真乘。舞花忽報難遭瑞。佳氣冥符不盡燈。簪菊園中紛一色。兜羅世界結千層。五天應供非虛語。從此雲頭日日升。

送宣上人遊方

七軸蓮經誦已通。定將何事作家風。當知法界重重意。盡在雲遊步步中。金臂見時猶是妄。玉毫光處未爲功。路頭全記文殊指。須著工夫子細窮。

次韻郭功甫從何守遊白雲寺

已仕因循已過三。買田歸去不須參。高明漸擬凌清漢。皎潔方知在碧潭。試酌甘泉來覺晚。已躋絕頂尙猶貪。使應從此都無事。祇有君恩未報慙。

題白紵山

回見黃梅雨後天。烟林常在笑談邊。早時欲到不自果。今日初來端有緣。無復新聲傳玉齒。空餘殘照滿金田。不知誰是雲霞侶。聊揖高風一悵然。

石端若以朱絲欄見邀。作而偶失所在。久方得之。喜而賦詩。寄丁希韓。因以見及。遂申前志。次韻。斷雁沈蹤共倚欄。定應齊客解偷關。忽驚遼鶴排空至。何啻廉珠昨夜還。假寵已慚名下誤。強顏終愧筆

頭慳江流有盡情無盡須挹高風付子山。

再領玉局昔東坡翰林作詩送戴蒙有玉局他年第幾人之句後自嶺外歸遂領玉局予復官亦得之坡今亡矣悵然有懷。

東坡因地宿相親玉局終爲繼戴人祿仕豈知承末軌恩光又許襲前塵青蠅附驥原非緩白玉無瑕晚更眞泉下有靈應首肯不隨凡劣易淄磷。

次韻葛大川喜王君相過并寄吳思道

君恩曾未報纖埃倦緒淹時鬱不開高義不忘轅下舊好音常自日邊來欣逢雅好非空至頓感陽春泛酒迴早晚退朝紅藥下細談陳迹共餘盃。

呂吉甫第乃謝鎮西故居中間常爲佛刹而雙檜則舊物也劉夢得有詩因賦其韻。

故國悲涼古木奇勢分庭下蔚相差霜根半露出林虎晝影全舒破賊旗寶界曾迴鋪地色節旄還映插雲枝劉郎風韻知難敵儒帥端能表異時。

題張湛然兄弟所居壁時謁之不見

樂全老子如星月眞一仙人似鳳鸞早歲光明均照耀異時文彩避高寒低回氣類追千劫邂逅風流得二難環堵蕭然清徹骨却疑深雪臥袁安湛然乃安道之孫

李去言相別二年忽得書知在吳中蒼書偶成

宦路相逢一笑休。共知身世兩虛舟。楚材有用誰青眼。趙將無功枉白頭。會見姓名通北闕。何妨風韻冠南州。求田接武如鳧鷖。只欠元龍百尺樓。

與珪元白相別之次日大雪火邊有懷其人

上人偶作十日留。才別便覺如三秋。應覺擁爐華藏客。不知對雪姑溪愁。清詩字字吟可老。冷日愔愔誰見投。媿我霜髯不容翦。寒灰撥盡欲何求。

次儲子椿金陵作別韻

千里波濤一葉中。急難平日但聞風。自非積習有天得。那復間關特地同。樂事放懷須命酒。生涯何處不飄蓬。先歸只作尋常別。折莫尊前感斷鴻。

又次子椿同君俞三詩

倦途回首已無牛。獨向田間涉半秋。倚杖固知同失馬。攀援猶恐昧操舟。漸逢陌上相推醉。尙有空中未下鷗。可是道邊無葬地。肯將身世曲如鉤。

西來不復見青牛。問遍生涯兩鬢秋。但受郢人夸鼻斲。豈知蒙叟是腰舟。柱頭寂寞千年鶴。波面分明一點鷗。不向虛中問消息。磻溪終老但垂鉤。

隱隱山林似臥牛。紛紛鎌擔喜逢秋。虛名謾託三春柳。實際須歸萬斛舟。未信此生真野馬。且將餘日寄江鷗。崎嶇精衛人空笑。終恐長鯨上直鉤。

次韻子椿金陵相會詩

濛濛小雨落征帆。漠漠烟雲遠近山。屬意幾回真入夢。欲來常恨澀如灣。家程豈復嗟留滯。物外何妨且往還。使恐都人入圖畫。却應難寫是高閑。

次韻子椿遊雨花臺同長老德正

勝遊自有經年約。佳客難同信步來。無復風烟翳寒日。漸催花柳映高台。雲光故事空陳迹。玉樹遺音失舊哀。今昔循環等相視。欲尋歸路更遲回。

又次莊居見貽佳什

茫茫巨浸託船歸。風不充帆氣易衰。猶喜歲寒逢逆旅。不將人事異當時。從他老去知何用。由是終焉豈自遺。獨有東阡南陌意。莫辭扶杖數相期。

姑溪居士文集卷第五

律詩

用聖行韻和呈幾仲

牢落郊原正早秋。書來起我頓風流。絃歌韻裏識琴賤。鴻鵠飛時逢奕秋。極目烟雲來指顧。何時談笑共沉浮。文章落筆驚人眼。新有聲名舊姓侯。

和人見寄二首

雍容閑雅許君都。山緒相逢一笑無。休把盛衰觀世諦。且將言語共詩圖。人亡人得同吹吶。潮落潮生等據梧。只恐後庭歌不盡。曲終翻被鬼揶揄。傾蓋相逢惜別離。等閑談笑盡心期。他年終解如今日。比念常應寄異時。餘事不妨多蠟屐。放懷贏得盛留詩。早攜桃葉尋歸路。準擬花間倒接籬。

澄虛堂

公子高明悟劫灰。鼎開軒語致幽懷。縈雲疊嶽巖鑿天去。極目滄波入坐來。千首詩成談笑裏。百分酒盡管絃催。自憐曾是高唐客。欲賦慚無宋玉才。

和子椿

一番霖雨下商巖。末路方收破冢帆。雞肋未能忘叻畝。驪珠還見發囊函。潤分餘浸回枯轍。色借陽春起陋緘。自是亨嘉相際會。便應從此出塵凡。陋緘一作病杉。

莊居寄友人

愧黃時節早相期。留滯田園阻整依。聞道程文大超軼。卻因詩句接光輝。君能活計如公理。我愧生涯負表微。已向青山託遺老。不應專有謝元暉。

和友人見寄三首

明月平時敢自因。時高蘭玉信吾人。便從巖嶺如無媿。更許毗邪約問津。每見似曛千日酒。不言常備四時春。妙雲豈獨南遊契。又喜鍾山近得鄰。俗駕難回固有因。勒移終愧北山人。不辭冒雨投歸步。始信忘形是要津。一笑未容披軟語。十分先覺報新春。定應偏契王郎便。消得從來願卜鄰。除却吟詩總是塵。道人應笑可憐人。固知參請能成佛。未到升騰且咽津。村落風煙常似臘。禪房燈火已如春。會須隨例餐鱸子。聊借明窗作暫鄰。

懷舊二首

陳迹回頭似夢餘。花應長好但人無。詩成固已名千古。墓上誰傾飯一盂。流落丹青驚始見。形容筆墨竟難圖。公孫自是天同派。謾託周人載碩膚。

花存人往祇天知。日暗心搖却自疑。尙想漢庭傳詔令。如登魯廟見尊彝。一時鸚鵡娛賓賦。百世甘棠美召詩。安得殘春逢海上。盡傾衰淚灑新枝。

送人入館閣

天祿崢嶸北斗齊。享窮人欲去無梯。自非終賈名偏重。祇恐蓬瀛到却迷。鉛槧異時森杞梓。功名他日看虹蜺。中朝若問姑溪老。但道摧頹一木雞。

邂逅故人

湖山勝處得君家。懷祖曾於膝上誇。不見多年應宦遠。相逢何事却天涯。朱絃無復來湘水。駿骨分明產渥洼。聞道賢勞多野處。新醅聊寄敵霜花。已將身世等浮雲。又向江邊得故人。數日暝寒埋雪意。一番佳境爲時新。村醪淡薄聊資笑。洞戶深閑自有春。已幸鄰封同寄老。却應風月費精神。

金陵懷古二首

焰燧何勞鼓萬牛。聊將一帶付幽流。纔聞浮鷁來波上。已見牽羊出石頭。舊穴依然披信汐。古祠誰爲荐時羞。功名到了成何事。擾擾空移夜壑舟。霜天日晚獨沈吟。潮上風來別是音。恃險戰爭休想舊。凭高臨眺且論今。數聲雁蹙千年恨。一片帆驚萬里心。不是江山解磨折。却應人物自升沉。

和人見寄

壯志崢嶸不自伸。低回聊此接波臣。雖非腰重真騎鶴。猶勝途窮強泣麟。擊節久懷江上晚。空樽未放網邊春。固知遺老能相契。翻愧公輸作幸民。

邯鄲叢臺

禾黍離離露一邱。淡烟輕藹夕陽秋。微基西枕邯山盡。往事東隨漳水流。御輦金車何處去。閑花野草幾時休。可憐全趙繁華地。留作行人萬古愁。

久雨次韻君俞

塵埃肺腑屢更時。淫雨平欺素頰垂。忽覺光輝慰岑寂。坐令華茂轉離披。中宵未厭徒空壁。雅意安能系赤墀。獨有晴明陪擊節。回腸猶在不爲詩。

次韻君俞瑞香

占盡韶華異衆芳。分明絕豔降昭陽。肯同繁杏攬春色。謾道幽蘭有國香。大葉尙疑攢處鬢。馬嵬猶恨去時囊。牡丹獨賞慈恩句。只解金盃比發粧。

次韻君俞四首

文章老去豈能神。猶有殘膏占舊名。賦就賈生空自感。詩成侯喜近聞聲。拾塵已信非嘗飯。撒豆終知不是兵。多謝佳篇慰岑寂。使思約伴問歸程。

合浦圓光降下胎。豫章千尺本天材。未能海運參搏翼。聊復舟行共覆盃。白髮情懷雖草莽。青春消息自
條枚。河妨接武窮幽致。莫待風光却見催。
語解驚人固有神。始知無不是虛名。方觀去接天邊翼。何事猶諧爨下聲。齊晉近能通敵血。江黃詎敢議
鏖兵。老來肺腑都荆棘。頓欲鋤鋤不計程。
熊掌如何得豹胎。棄常嗜異信難材。端能不學邯鄲步。正可同嘗沆瀣杯。有意良圖休我老。他年卜吉佇
君枚。雲間日下容相與。且置然其特地催。

堤上閒步二首

風旌江末信漂浮。散策騰騰亦謬悠。未必縈回能擢勝。却疑平遠解供愁。年衰易感難留日。機盡應無不
下鷗。渡口舟橫晚潮急。一番佳意憶蘇州。
暖風輕蹙浪花浮。留滯江城媿謝悠。吟苦空多屈原恨。賦殘猶贖庾郎愁。漸因卜築投歸鷺。聊託游浚習
戲鷗。可笑蠹官殺風景。滿船絲管載涼州。

題韋深道寄傲軒

南窗何似北窗涼。寄傲來風各有方。千古光輝如昨日。一時收拾付新堂。已驚醴裏醅初綠。更覺籬邊菊
漸黃。就使主人官卽顯。此間高興定難忘。

次韻君俞兼簡少孫六首

連璧兼金盡出倫。雪髯霜鬢信陳人。能忘枿鑿方圓異。許接風雲變化新。絕韻淹時勞極目。虛齋窮日但凝塵。何當一笑披環堵。賴月吟哦未厭貧。殘編敝稿掩還開。好意經年不暫來。伏櫪已應真款段。脫鞵終擬謝低回。頗傳共坐侵斜月。更想微吟荐罰杯。居士從來少風味。獨將愁眼望初梅。莫羨財多石季倫。任從閭里笑長人。五湖浪迹名終在。六印懸腰眼暫新。且樂歌呼隨瀝灑。不妨文字洗留塵。年來頻覺珠璣富。萬戶侯家却是貧。惓惓懷抱不曾開。忽忽還添一歲來。燈火香花隨贊祝。兒孫旛勝共裴回。休誇路寢當前拜。誰得屠蘇最後杯。何物相期同一醉。爲君催發檻前梅。定應春到今幾日。但覺耳邊多醉人。已分餘生不如舊。却應佳句漸能新。悲來徒有縈心淚。談盡空驚滿眼塵。到得雖無真我輩。一瓢猶是作家貧。書空懶作咄咄語。催老祇怪駸駸來。斷夢已將愁共遠。離魂不覺泪驚回。病餘想見嶄巖玉。歡處猶懷宛轉杯。能伴晴和著屐否。深山應有未凋梅。

觀東坡集

今朝又讀東坡集。記得原州鞠獄時。千首高吟賡欲徧。幾多強韻押無遺。固知才氣原無敵。獨有心期老不欺。泪盡九原無路見。冰霜他日看青枝。

姑溪居士文集卷第六

律詩

再次韻人字韻奉送禹欽且堅再來之約

涔涔梅雨漲江濱。耿耿僧房借鉢人。秀色驚回隨念到。孤懷贏得暫時新。何妨一笑空諸有。更覺三摩淨
六塵。髮患年來倍傷感。送君衰淚不容貧。

相逢懷抱各全開。蔚結才舒條又來。傾倒已辜將進酒。追隨休賦上林回。臨分莫作牽囚歎。故事須詢河
朔杯。看取滌翁宜自警。空將遺原感蘇梅。

襲前韻再次簡少孫

由來氣類卽天倫。孰謂劉琨獨可人。稍隔相從更無味。幾因拈起又還新。席間誰致龍皮異。雪裏常懷鶴
羽塵。祇欲期君拾瑤草。庾郎二韭未爲貧。

雪意埋雲蔚不開。新春還傍故春來。未堪骯髒倚門立。聊復差池接羽回。得喪何知求失馬。盛衰贏得付
傳杯。風流二妙天憐我。種玉秧中更插梅。

子默清真本絕倫。羊曇曾是個中人。林泉不作南風競。旗幟還因對壘新。金鑛躍鑪原有豔。冰壺瑩月舊
無塵。何妨再葺昆陽戰。尋邑師行固不貧。

記得金樽特地開。舉頭新歲又重來。銀潢已分經年隔。玉節猶期舊臘回。千汲浪迷雲表夢。百分愁寄燭殘杯。醉鄉誰謂無消息。已覺歌聲傍落梅。

次韻雪

臘日頻年未嘗雪。今春雪與臘俱來。暖歸白傅金焦葉。寒逼溫郎玉鏡臺。幾處歡聲動絲竹。一番佳思近離堆。新詩不以尋常見。萬里豐登氣已回。

題張約之長春閣

江山信美亦人同。寒暑隨時興易窮。寓意果能超物境。養花長欲占春風。何須戶外屢常滿。自樂尊中酒不空。可笑道人猶有恨。一番紅盡一番紅。

後圃

鶉鳩呼婦天欲雨。杏子退花鶯未雛。庭前已覺綠半毯。酒面忽有紅雙鳧。芳物戀客不忍去。主人好賢誰復如。會應百歲享此樂。何妨盡作重屏圖。

寄題子椿野軒

江山秀氣表吾人。棊下開軒得趣新。不擬舊遊離几席。常令美況隔埃塵。客來談笑無非楚。紙上文章近過春。分我一枝頻見約。乘槎行欲問通津。

逃暑無地。偶過君俞。聊資華屋廣蔭。以揖主人之勝。綢繆禮意。遂至抵暮。君俞有詩。因次韻二首。

無功衛鶴偶乘軒。虐暑從誰解倒懸。頓覺御風凌絕境。似逢調瑟認華年。分光已幸參東壁。裂地何須得酒泉。自惜抑揚非瓦礫。倦途終愧失陶甄。

十輪楊暉舊軒軒。四壁相如似磬懸。豈謂投懷忘晚節。每容佳處共流年。笑談璀璨風生坐。翰墨縱橫思湧泉。土直固難重就器。轉鈞猶幸識精甄。

歸自錢塘。復蒙君俞佳句。欽歎不已。更兼特枉聊賦來韻。

吳山塵跡已飛埃。投老還驚病眼開。似泛靈槎海邊去。却因華表鶴歸來。情移客枕收殘夢。恨着江梅戀故臺。使覺新篇資六翮。飄飄真是子虛才。

贈金陵榮天和

生涯已定不干時。收拾工夫且作詩。瀨水方來弔東野。同安初喜識邱遲。兼將佛事質三昧。又見風騷出一支。投老相逢能幾許。何堪得句每相期。

劉君以地理之學。各邂逅相遇。求詩爲別。因賦長句。

久聞祕術獨超羣。肯向青囊學景純。解使山川如在掌。須知禍福不由人。論功合附天仙籍。底事猶隨客路塵。滿眼峯巒應有待。何妨裁剪出精神。

伯鎮客居傷春佳句。輒賦元韻二首。

休論莫莫與休休。老眼逢春且暫留。未必餘寒更能久。祇因殘蕊易爲揉。及時行樂何妨剩。感物興懷謾

自愁。南北生涯等羈旅。定應無著是清流。
紛紛到底不如休。空把閑心見便留。昨日白消行處去。今朝綠遍定誰揉。且從寂滅翻千偈。安用深湛詠
四愁。我坐言多欲無語。每慚佳思枉詩流。

次韻夾竹桃花

料理愁懷落那邊。桃花烘日竹含烟。牆紅密納連昌晚。夏木深藏繡嶺天。籃輦造門如會面。漁舟失路想
當年。因君詠出黃筌筆。從此風光生彩牋。黃筌作夾竹桃花屏風。東川。四川。節度使廳。皆有之。筌今不在。以真花片補其缺處。幾不能辨。枝上地下。相契不差毫髮。天下

次韻聞笛

涓涓水咽衆山泉。隱隱雷驚二月天。共喜春工能應候。方知節物似烹鮮。倦途所欠無多子。勝日相逢又
一年。好是羣花應競發。不須留待柳三眠。

和郭功甫贈陳待制致仕二首

十年朝馬望前塵。晚作琳宮物外人。徹骨清風真有韻。醉心常得本來淳。新栽松菊開三徑。舊檢方書備
六陳。不是詩翁形美頌。丹青難寫自由身。
南北紛紛不覺塵。鴛鴦湖水解留人。乳浮香焙誰同試。蠹泛家藟分外淳。禪寂久因師粲可。婚姻便合繼
朱陳。莫從舊路尋歸夢。占取東籬採菊身。

和人三首

昂昂野鶴固難羣。皎皎冰壺不受塵。一笑每逢青眼舊。多情空媿白頭新。西風未用高紈扇。東道應容岸角巾。珍重長瑤倚雲瑟。瀟湘誰是賞心人。經年牢落別離羣。準擬歸來拂路塵。妙語獨從書上得。歡悰猶欠坐中新。頗聞洛下傳佳句。更喜嵩陽識墊巾。幾欲軍門示巾幗。老來猶更不如人。荆溪風物記當時。吹絮河豚下箸遲。綠滿金田朝應供。紅殘朱檻夜論詩。幅巾已託遺民後。杓柄猶懷象骨疑。早晚雲間見金臂。空慙翠竹謾抽枝。

次韻探蓮

聞道栽成十畝蓮。便思挑出杖頭錢。定知荇菜參差處。不是決明顏色鮮。紅日半移芳草岸。清歌低泛木蘭船。驚心未得同真賞。空媿詩豪白玉篇。

復次韻

國西華麗占池蓮。曾記開樽奉賜錢。幾欲漂流勞滯念。又驚紅綠映澄鮮。主人無間容聯步。勝日何妨更買船。滿挹香風振歸袂。更煩佳思出新篇。幕府風流舊泛蓮。裔孫家世掩青錢。別開眼界霞爭爛。分得秋光菊未鮮。燈陣有心吹醉帽。珠盤何日瀉歸船。錦囊示我鏘金句。空愧巴吟綴後篇。

次韻子椿莊居述懷

偶因秋葉記初春。增損原無爾自貧。病骨蕭條驚歲晚。新詩來往媿情親。未應謝傅終有涕。誰謂劉公是可人。艾火呻吟對搖落。不堪庭草又還新。

次韻早秋

衝衝時序一郵亭。睡美從今氣不蒸。便好心期金葉酒。乍驚夢在玉壺冰。栽松種竹來三徑。效策輸龜待十朋。百尺樓高誰與共。倦途初喜接陳登。

同子椿遊三品石得井尋三閣故基久之因以次韻

桑柘邱墟輦路長。景陽依舊在山陽。石標官品名常在。井記胭脂迹半荒。弔古謾勞興感慨。寄懷聊以共徜徉。相看等是未推枕。何日同驚夢後梁。

陪延之泛舟歷湖至苦竹寺次韻陳致君席上所賦

已涼時節未霜前。十里平湖共酒船。巖岫湧寒清徹水。芰荷翻浪綠連天。百年過眼真聊爾。一笑投懷豈適然。獨有黃花似迴避。空緣紅粉不能先。

宿太乘贈初燈

倦遊知止未知還。平日生涯只在山。金碧喜逢雲外境。文章重見管中斑。篆煙縈曉留無寐。寶鐸吟風笑不閑。他日雖歸棲有地。勝遊終寄夢魂間。

姑溪居士文集卷第七

律詩

賞心亭

賞心亭角倚欄杆。虎住龍蹲自屈蟠。無復埋金鎖勝氣。空餘飛鷺識前灘。百年名在人何處。萬里潮平雨送寒。幾向後庭更白紵。不堪殘照下漁竿。

延之云。累日把酒。止在相近處。殊不快人意。坐間命徧索城內外。可以延處之地。將往。因之得城南張氏園。秋花斑駁可喜。遂劇飲。待月上。戴花作樂而歸。市猶未撤。觀者如堵。次致君韻。

累日相看似處陰。今朝乘興共追尋。曲欄方沼爭留步。秀色新啼總會心。酒面屢從羅綺發。花心休被雪霜侵。燭城醉路凌初月。但覺人山一徑深。

偶書二首

閉門只欲渾無事。門外何嘗有事來。生計不須憂水旱。仕途休更問梯媒。身安種種皆三樂。客到時時共一杯。此外華嚴是歸處。眼前樓閣竟誰開。小山相對數椽地。樂與心期境自多。有酒未妨同客醉。無情到了任君魔。探薇行歌亦勞矣。飯水曲肱還會麼。只恐時來把不住。更看究竟事何如。

贈人

落得清閑與物疎。扃門終日似山居。案頭新有歸田賦。架上元留緯世書。紫府未須窮祕簡。丹山重見引名雛。詔恩咫尺來相繼。還許頻爲賀客無。

和兩翁軒

何處又傳金椀出。幾人爭看玉山頽。幽懷不是風期舊。異境難從指顧開。猿鶴已回塵外駕。烟雲休造眼中哀。未妨二老同巾履。香火終年謝劫灰。

次韻珪首座

陰重爐和欲雪天。氤氳香篆不藏烟。南游步步如同歷。西竺層層有舊緣。未覺鴉聲驚戶外。似傳梅信到窗前。老來酒量無消息。負此佳時一慨然。

和錦繡亭

漂泊生涯寄一萍。勝遊長記錦花亭。山來已訝天能巧。春到方知地更靈。雖許登臨追曳尾。却應顏色未忘形。何妨共保千年約。白帽回頭笑管甯。

吳思道相送同宿崇因二首

端門風月十年拋。垂老山林寄一瓢。可得故人來市脚。共尋陳迹到江郊。麥黃且置塵中累。眉白欣投世外交。只恐話長清夜短。明朝去路不相饒。

形單影隻久相拋。鼎食端能勝飲瓢。已分餘材辜北闕。原非不雨自西郊。來田聊復同中隱。玩世甯嫌瀆下交。千古平泉有遺恨。漫勞精爽畏原缺饒。

寄僧

得皮得髓謾多門。實際圓融理自存。諭意當時纔一笑。還鄉千日見三孫。維持佛法原無事。建立家山盡有文。占斷乾坤今鼎足。會多哮吼慰傳聞。

寄題吳思道橫翠堂

紅塵擾擾功名地。不礙詩人得趣幽。何必千巖連萬壑。能令六月似三秋。茶甌變乳隨湯泛。香篆縈雲盡日浮。時覺東城添紙價。應知得句勝封侯。

簡劉君秉

劉郎本是風塵外。畫舸新從越上來。聞說露芽如爪活。更多溪楮截肪開。雪消鼎滿聲頻涌。鵝轉池心首屢回。洗滌睡魔臨二景。敢辭瓦礫換瓊瑰。黃庭有內外景。

八月十一日。九月六日。二十四日。三夢過趙仲強家。坐中人物笑語一一如平時。因寄長句。庶蒙藻思見酬。因投一會面之應也。

憶陪金釵醉紅顏。回首風光杳靄間。老去未忘三汲浪。近來頻夢八重關。雲烟舊路到何日。燈火虛堂直似山。只恐斷魂收不得。更須佳思與招還。

水中登王德循月閣

龍宮海藏固聞誇。偶襲初涼泛客槎。層檻迴高臨落日。洞房無數盡浮家。閭閻可想知何在。天水相連杳莫涯。惜我華嚴記殘帙。欲將因地付袈裟。

德循詩律甚佳。方幸拭目。因作拙句以勉之。

唐人好詩乃風俗。語出工夫各一家。前輩相因多自任。後來無復更相誇。半山老子偏遊戲。真一仙人每歎嗟。傍出豫章登一格。憑君細與辨龍蛇。

律詩

之儀家當塗七年矣。屢過禪岳山下。望高山塔。欲一遊。輒不果。異時山主勲公大師。與其子宣上人相過。因往報之。取路回遠。薄晚方到。遂留宿。棟宇一新。舍次皆得其便。而宏麗高朗。唯見者知焉。又復規範齊肅。鐘鼓應接。問之。乃勲一力所就。絲蓄粒聚。未嘗毫髮資之人。此尤難者。感歎不已。因賦二小詩。

峯塔頻經眼。伽藍未息肩。多情兩父子。同住一雲烟。繚繞尋幽徑。從容慰昔年。本無留客意。投分且遷延。去住如流水。興衰似轉肩。新工幾奪目。舊爨僅留烟。願起三千劫。功收十八年。兒孫盡龍象。家世自綿延。

藏雲山居

鳥語晚更好。山風秋轉涼。心閑日自永。簾冷夢尤長。赤薦新春稻。清添舊蔭香。此身歸有地。去路尙何妨。

雨後山尤好。秋來方此時。心清覺老健。步懶欲歸遲。林響驚鷗鼠。風閑叫畫眉。善人吾豈敢。去此尙何之。

山居夏日

金鑲籠窗日。黃繒蔽柳蟬。戀鶯忘日轉。借榻就涼偏。好作宿山計。唯堪被俗牽。歸送迎晚照。豫促渡頭船。

誠上人遊方既歸林下焚香誦經以嚴報地相見欣然留不欲去遂賦小詩

委曲披高下。虛明得靜深。佛香平日願。經卷本來心。地據三車上。塵無一點侵。出山應有恨。何處似如今。

宿青山坊君錫館置甚款時方興墟

命駕追彭澤。開懷得十龍。殘寒偏惱客。小雨未妨農。已幸同歸轍。何勞更賃舂。川原如故里。疑是舊栽松。

將過黃池中路寒甚風猛不可行復歸青山坊投宿

過午風雖惡。此心難自安。如何一時頃。遂變十分寒。忍聽僮夫訴。還思昨夜歡。祇應賢地主。猶作故侯看。

次韻俞希賢大暑家居寄天甯二老

靜退陶彭澤。風流支道林。論歡雖暫阻。投分本來深。客舍汗如洗。僧軒雲正陰。莫因俗眼礙。終負勝遊心。

姑溪居士文集卷第八

律詩

和答友人

此日逢春社。占龍得賁山。雖能素願合。未放老身閑。家世綿延遠。功名指顧間。自應天有助。一到一開顏。
春來自多雨。行處只逢山。賦分皆可樂。貪生常不閑。人歸挑菜處。鳥語落梅間。翻恨新增酒。何從解醉顏。

食笋

燕雀初爲友。烽烟近卜鄰。不嫌千語聒。只怕一籠新。病眼常如睡。歸心喜似人。枰餐猶見笋。不省已無春。
牆外是西關。每夜得應烽火。

疎簾不礙日。缺甃宛如塘。默坐千名佛。忘形一炷香。卷中貪味永。鏡裏任顏蒼。飲後纔推枕。逡巡又夕陽。

謝陳無已相訪

下直來天祿。柴荆故遠求。論心日恨短。歸路雨何憂。紅葉繽紛曉。黃花爛熳秋。會須尋此況。擊節再相酬。

昨日偶到北觀蒙君俞元載元發明叔惠然見過

勝日欣相得。曠懷誰與同。如何四君子。肯顧一衰翁。林杪收殘雨。簷牙遞好風。歸時不須問。更待月如弓。

回酒

莫笑和州酒。和州酒却醇。聊資千歲祝。用贊一陽春。柳信溫將報。梨晴點向真。醉尋平日路。好在武陵人。

書長干僧房

異日延禪地。今朝選佛場。真身痊堅固。層級韻琅璫。雨灑家家潤。燈傳處處光。曾將一則語。要路截諸方。

無題三首

邂逅俱青眼。招攜媿白頭。穿林猶畏日。坐石忽驚秋。不作崎嶇倦。幾成汗漫遊。臨分懷杜老。月湧大江流。步武高低外。生涯夢寐中。不知三徑足。信是一生窮。觸目如逢舊。隨緣似有功。便應參羽翼。何異注魚蟲。軒廡千尋碧。江山一抹紅。微吟接僚友。健啖趁羣童。戀別猶能暫。論歡昔已通。更憑將此況。遠問雪溪翁。

題歷陽天慶觀自然庵

一日復一日。新年卽舊年。本來無欠少。強自起攀緣。妙悟通三境。清風寄七絃。昇騰如未果。且作地行仙。

自大乘將遊湯泉道中

迢迢山路永。漠漠曉風昏。雨歇鳩呼婦。年豐稻有孫。放懷悲暮齒。野飯寄前村。只恐今宵夢。憑誰續斷魂。

雨中過明覺招上人輒留小詩

雨路如投洗。山行似踏繩。深閑逢竹院。歡喜得詩僧。語款疑纒繭。心明自有燈。難忘惜別處。高義等邱陵。

宿滴水庵懷趙德麟和壁間韻

瀑水瀉靈竇。鏗鏘韶濩音。樹深猿嘯月。山迴鳥啼林。一曲廣陵散。再歌梁甫吟。天邊有鴻雁。莫寄此時心。

夜行鞏洛道上

夜久露華重。寒鴉不肯棲。月推銀海上。斗過玉繩西。風脫林衣瘦。山擎雲帽低。流螢三四點。趁隊過前溪。

題李欽之承事宅

松竹龐公宅。邱墳倚柀家。和聲敦雁序。秀色茂蘭芽。魯秉方如昔。淮流詎可涯。躊躇不欲去。寒日任西斜。

離宣城

倦客登舟際。江城欲暮時。恨長山自遠。心速棹歸遲。村市明漁火。嚴城起鼓鼙。詩成真有助。新月上天涯。

秋日遊青山訪太白墓二首

潦倒忘衰日。風流襲塾巾。未能分朽骨。還此挹餘塵。弔古無千載。傷心爲一顰。依稀如到眼。氣類信吾人。淹時苦炎暑。此日過初秋。舊籍存千畝。彝倫詠九疇。但能尋曠蕩。何必事深幽。未媿遼東笑。真成知北遊。

遊青山因過西莊

青山忽相值。一笑脫征衫。未就三都賦。聊尋五柳潛。並遊雖得意。作闕更愁兼。問字終忘倦。言歸但小慚。旁求須作相。未聘且耕巖。贈別無多語。禪身要律貪。

同榮天和遊石城

茲遊久寂寞。勝士偶陪隨。竹暗笋初熟。江深鱸正肥。但須頻結社。何必訪題詩。會有重來日。還應記此時。

謝人送魚

珍重黃池秀。風流迥出塵。多情念羈旅。脫網寄鮮鱗。掀動龍蛟宅。驚回匕箸春。丹青如得便。更擬問通津。

題齊雲亭

凌空登白紵。此地與雲齊。一覽衆山小。方知人世低。暫留蝴蝶夢。終負杜鵑啼。回向禪關客。何當別有梯。

賀時相生辰

錫羨來經世。儲休表降神。雲間瞻鸞鷲。天上識麒麟。蘊藉三冬學。形容萬古春。班庭傾玉筍。鎮廟契金人。帝載熙明格。朝筮絕擬倫。淵懷參密幄。同德在斯民。有作皆前用。無言不緒陳。光華榮壽躋。蕃錫會昌辰。寵接張侯異。年頒衛武均。江干空引睇。無路襲餘塵。

姑溪居士文集卷第九

絕句一

登山未還范景仁以詩見促次韻二首

撲面烟霞曉更加。偶隨黎杖訪仙家。斜陽不見登山屐。獨繞長溪折夜花。危檣烟際聳層城。潮落沙頭眼更明。不覺歸舟犯牛斗。天風吹下步虛聲。

次韻景仁海次西還二首

留滯初春寂寞濱。眼明歸路一番新。何妨更作重來計。枝上微紅解惱人。二月春陰到水濱。秋風重見玉蟾新。無端擾擾來還去。只恐沙鷗解笑人。

又次韻

尋春何惜駐征鞍。只怕春歸不怕寒。故國山川無限思。我來仍得雨中看。

柏臺自述四首

窮日悒悒已死灰。似沈智井念昭回。一聲霹靂起平地。頓覺青天萬里開。鑽龜打瓦不曾休。金注昏人豈自由。誰謂純誠無感格。會逢公議報私讎。一夢揚州似隔生。輕舟來往但貪程。莫年殼棘兒童念。風物依稀媿此情。

熬熬內火戰驕陽。鶴唳風聲便著忙。波浪翻天誰與渡。却應甘井是慈航。

江西莊上久雨

去秋欲雨不得雨。今春望晴還未晴。螻蟻尙知爲自便。強將私意與天爭。

路西莊絕句

麥未登場已插秧。更爰雨過水還傷。一生能著幾量屐。白髮蕭蕭祇管忙。

宿采石

江聲隱隱風前恨。雁陣喧喧枕畔愁。更覺孤衾如潑水。始知今夜宿山頭。

寄西莊梅道者

因緣時節本相期。只恐蹉跎醉似泥。洗盡從前留意處。何憂金臂不提攜。

偶書

元宵燈火鬧遊人。偶向忙中得此身。淨几明窗塵不到。弄黃先見一枝春。

通中玉冷夢偏長。花影籠階月浸廊。挽斷羅巾留不住。覺來猶有去時香。

瑞竹卽事

芭蕉葉密柿陰濃。散髮西窗到晚鐘。霹靂一聲三尺水。旱天方信有真龍。
纖絲不掛汗如傾。一霎風來夢乍驚。自是人心有涼思。強將庭葉作秋聲。

鴨脚初成緣未齊。芭蕉仍在柿陰西。推遷節物均如此。眼界何須苦自迷。
書扇

會稽陳迹久荒蕪。流落江城墨未枯。好向溪邊示行客。問人能出百錢無。
立秋日書唐行成扇

自古逢秋悲寂寥。我言秋日勝春朝。晴空一鷲排雲上。便引詩情到碧霄。
題郭熙畫扇

蹇驢破帽聳鳶肩。石裏長松欲到天。六月塵埃汗如洗。始知立意不徒然。
孌孌涼風八月初。試揮椽筆寫江湖。還家預想迎門喜。爭問今年得意無。
又書扇

幾年無事在江湖。醉倒黃公舊酒爐。覺後不知新月上。滿身花影倩人扶。
畫夫子扇

烟梢雲頂石藏根。溪壓輿梁曉乍分。車蓋定尋何處路。皇皇猶想爲斯文。
題畫扇

曾記終南雪裏山。玉峯瓊岫聳巒岏。風流轉入丹青手。畫作江城六月寒。
落筆無因似退之。每逢佳致却如癡。孤高全露秋來骨。無復山紅間壁時。

莊上書事

柱礎猶蒸濕未休。懸知雨意未全收。只憂場上芽生稻。不厭田間水拍溝。

訪僧不值

我來獨愛南天竺。公去誰烹北苑茶。賴有清風猶好客。掃門楊柳影交加。

天甯衆寮卽事

不看經也不參禪。時去時來又一年。祇願闍黎終有信。大家留取草鞋錢。

宿吉先之學古堂

停驂假館雪初晴。學古堂中氣象新。多謝故人無棄我。一爐軟火煖如春。

書于子高宅

兒童雞犬語聲喧。桑柘縈紆綠蔽川。斗覺門庭蘭玉盛。更將簫鼓樂豐年。

書俞秀老書卷後

荆公賓客晚多奇。休歎穰侯見事遲。雨過半山初睡足。何如蠡力負山時。
荆公晚有佳客乃其自云魯直遂因爲故事

寫裙帶

輕裙碎摺曉風微。弱柳腰肢穩稱衣。更翦垂紅平窄地。雙鳧似恐見人飛。

采石

雲山夾岸去層層。來往扁舟恨未能。更有尋常最佳處。無風一日到金陵。
雞籠山下是和州。隔岸聞呼見點頭。不見東歸夜郎客。錦袍誰共醉扁舟。

浴南寺園頭求詩

一重洗盡一重生。塵垢昏人不自醒。會得栽茄種瓜意。始知松竹本來清。

源上人硯

過嶺傳衣不傳鉢。何事眼裏更著榘。欲識黃梅半夜心。踏著稱槌硬似鐵。

訪采石臻山主不遇

入門不見主人公。座具袈裟在眼中。更有山童會人意。略無一事許相同。
十生采石寄漂蓬。廣濟雖名寺亦空。將爲新來有消息。依前山不結蓬籠。

次韻湖陰韋深道五小詩

髭鬚瀟颯面嶙峋。怪我多非舊日人。百里挈舟誰復爾。却應情重故情親。
書去書來又一年。祇應提處是虛鞭。相逢會得筆頭語。莫惜頻尋酒裏天。
江頭風浪似重關。幾許行人限往還。不是多情過相與。肯將一葉犯銀山。
三山礧雨列山風。我亦頻年強自雄。不負蛟龍竟何事。祇疑身世屬江東。
新來句法宛如陰。端與衰公伴陸沉。未易偏師壯秦壘。劉郎科甲舊成林。

次東坡梅花詩韻十絕

誰人月下奏雲和。一夜繁枝向北多。長笛未須論舊恨。且留幽思待陰何。
奸雄投老戀層臺。隨得分香散處開。枝上休論歌舞舊。尊中且泛綠於苔。
弄纒攀條日幾回。依稀長記雪中開。塵埃滿袂家山遠。底事多情拂眼來。
軟火明窗酒一尊。餘盃未減日尤昏。誰人爲折東來閣。續得何郎日斷魂。
黯黯危腸獨九回。故園誰對此時開。慙來聊把倚孤枕。更擬慙慙入夢來。
病餘憔悴拊空尊。子細思量意却昏。便覺陽和振枯槁。不須方士致幽魂。
初見今年報信花。定從清淺綴橫斜。無言對我應惆悵。不復當時處士家。
玉作肌膚雪作衣。剪裁風月綴寒枝。上池可飲偶無路。空愧當年帶下醫。
漏泄天工意不輕。傍春依臘獨分明。孤高不作繁紅伴。造化須知別有情。
姑射山前舊卜家。天香真色倚風斜。不須簷蔔分高下。要是東皇第一花。

贈呂煥

紅爐歡坐臘燈長。豫借春風發豔妝。流水落花無限好。却應雙鬢恨劉郎。

姑溪居士文集卷第十

絕句二

舟泊采石

經年欲到竟無絲。便踏今朝得暫留。弄月燃犀俱未暇。潮平且欲過西州。

和州太守曾延之置酒鼓角樓

樓臺烟樹接平蕪。水墨丹青十幅圖。認得黃山家住處。雲中相對似相呼。

延之置酒當利樓侍人勸酒

雲山遠近淺還深。宛轉愁顏頓不任。獨有綺羅知此意。故拈金盞十分斟。

延之置酒連雲觀北望邱墟掩翳相與凭欄感歎延之以所持扇見授云不可不記也因書之

後隴前岡一色松。飯含冠劍幾悲風。今朝笑語明朝哭。莫厭尊中酒不空。

延之置酒南園因書壁上

尊前景氣朝朝別。醉裏歌呼處處新。一度拈來一回好。主人須信異於人。

何子温家有巨竹數頃因成絕句

老綠陰森鎖晝寒。兒孫延裔不知年。欲歸頓失來時路。一似烏風暗雨天。

曾延之置酒後閣。供帳酒饌。物物皆內出。侍人以裙帶求書。

御醅盞畔千頭菊。椽燭光中四和香。紅粉莫嗟霜滿頰。也應歌處似周郎。

延之問及當塗近事云。君殆能容忍。我不及也。胡不遷居於此。便治館。因口占爲謝。

勝下淹時豈不知。或人疑我似陽癡。一塵固願受陳相。只恐鋒車便見追。

延之云。久遲公來。不謂迫之乃肯顧我。旣開此路。却當以匪人爲津梁矣。致我佳客。敢忘其德。口

占爲戲。

一水相忘輒自疲。青氈情厚失先期。從今不比鷓鴣數。更欲棠陰借異時。

雜詠

人間所樂甯過此。一事都無有俸錢。更向豐年觀割稻。須知身是地行仙。
老呼稚舞報豐年。極目黃雲欲際天。旋搗新粳供晚飯。只愁閒夢攪安眠。
解籜新篁綠未分。弄晴啼鳥語如文。翻風葭菼全疑雨。對岸峯巒便是雲。
平生粥飯寄伽藍。老日田園強自添。豈自著靴踏泥客。如何不許蹙深潛。

書龔彥本莊壁

青黃赤白千畦稻。遠近高低四面山。舊約買鄰今已決。却憂無力伴躋攀。
重陽過了十二日。階下黃花方盛開。節物參差何足較。且浮新藥共銜杯。

同彥本兄弟泛舟過北山

橫截西山一葉輕。曉奩初發鏡中行。異時常作琉璃觀。却恐丹青畫不成。

彥本鄰莊有欲售其所舍之屋者。相與就閱。遂書其屏上。與彥本爲約。

求田問舍太遲生。棟宇纔逢眼便明。憑杖經營須占早。連牆祇恐負柴荆。

龔深之曾約相從。偶不及。而深之逝矣。獨過其所約之地。遺像儼然。感愴不已。因書其事。

德公期我此聯裾。獨舍扁舟斷夢初。總帳一燈如晤語。淚痕空對兩龍駒。

初入褒禪山

近山回抱錦爲屏。金碧高低照眼明。四十年來勞夢想。白頭方喜慰平生。

褒禪知客求書因以答之

霜林班駁抱園田。曉日初昇宿霧開。憶得舊遊懷小杜。分明回望繡成堆。

褒禪齋後獨出三門步深山久之

兩脚都忘力不勝。穿雲度壑信騰騰。林深鳥獸知無迹。時見遊山一兩僧。

遊華陽洞行十餘步水阻而回。洞在褒禪側有呂公書華陽後門字

篝火宵深輿轉濃。可堪潭水斷來蹤。祇疑終有蛟龍護。玉室金堂未許逢。

自褒禪寺東轉將過大乘路中

不覺離家二十日。山林城市恣延緣。定因曾作和州客。長見雞籠在眼前。

欲過大乘先寄祖燈禪師大乘甚貧新開堂

大乘此去有幾里。聞道祇園近布金。但恐鉢中無客飯。止期經宿謝知音。

將過大乘薄晚不能到既見祖燈以寄一笑

踏盡田塍轉盡山。芥塘猶在夕陽間。主人縮地原多術。何事今朝特見慳。

芥塘大
乘地名

湯泉纔到便問浴處何在戲呈長老

欲從曠日過金陵。不惜湯泉兩日程。因就故人求一浴。何妨隨例得身輕。

題苦竹寺後亭

竹映丹楓轉短籬。有花開處盡空枝。春風想見如鋪錦。惆悵來遊不是時。

再過苦竹飯於寺前客邸

隼旟歌呼引紅妝。花帽追隨入醉鄉。今日再來如斷夢。主人依舊進黃梁。

絕句七首

海燕初飛掠水輕。醪釀開就照人明。旋傾煮酒嘗青杏。惟有風光不世情。

萬腔腰鼓打梁州。舞罷還催步打球。更借纜頭三百萬。阿奴要徹第三籌。

情隨榆莢不勝飄。心似楊花暖欲消。借擬瓊林大盈庫。約君孤注賭妖嬈。

謾尋蝴蝶却成癡。欲趁蜂兒轉更疑。自是心情怕時節。不如閒處伴黃鸝。
程氏園當尺五天。千金爭賞並朱欄。莫因今日家家有。便與常時兩樣看。
的的枝頭淺淺黃。未先顏色占年芳。任是剪成香更裂。鼻根眼界謾商量。
齋盂洗罷日方中。簾影低回破睡風。試問新浮一甌乳。何須親到廣寒宮。

和張文潛贈楊妹

草草聲名等漏卮。相逢佳處暫舒眉。我方擊節聊乘興。君可忘憂莫見疑。

宿觀音寺

倦聽簷間點滴聲。棲禽初報曉來晴。分明市合人爭語。清濁高低各有情。
烏啼鵲噪趁初晴。百舌新調燕羽輕。滑滑竹雞催布谷。聲聲鷓鴣喚流鶯。
留滯江南又一年。燕巢初就鵲聲喧。一番風竹搖窗外。猶冀曾來紫玉軒。

謝范守惠鵲

玉翎紅嘴小池中。雙入筠籠寄病翁。不是山陰親換得。自慙書學久無工。

畫鳴

野塘溶漾夕陽時。風淡雲閑草半欹。會得騰身振衣否。不教春色在花枝。
道人筆力與春爭。五彩都將墨染成。新浴羽毛猶更葺。似疑顏色未分明。

畫鵝兒

殼裏生涯殼外天。天真雖判尙茫然。只應未解長依母。每向沙頭獨自眠。

畫鵝

人間今復見丹青。生意初侵造物靈。却笑山陰何所得。尙須辛苦寫黃庭。

姑溪居士文集卷第十一

絕句三

書羅氏屏風

淨練平鋪月上時。無人吟得謝郎詩。酒酣直欲捉倒影。千古風流幾箇知。
鼓聲纔罷香烟起。湧出潮音滿座寒。爲問如何第一義。等閑拈却面前山。
一到山頭却下山。終朝只在翠微間。白雲本是無心物。何事高低伴往還。
日日春禽百轉新。明窗葉几淨無塵。平生似有叢林分。禿鬢何爲尙滿巾。

謝荊州太守送白玉泉酒兼詩云。第一荊州白玉泉。蘭舟載與酒中仙。且須捉住鯨魚尾。恐怕醉來騎上天。次韻答之。

荊州太守紫薇仙。遠寄漁翁白玉泉。長釣久垂魚未食。爲君一醉臥長川。

題隱者壁

聞道全家隱鹿門。竹籬茅舍寄江村。龐公事業無多子。只有平安遺子孫。

題漁家壁

賣酒罾魚止數家。卜鄰還在水之涯。扁舟定向桃源去。斜日紅開兩岸花。

偶題

霜風刮地雁連天。野舍衾寒感舊年。獨有多情夜來榨。床頭滴滴慰孤眠。
洛陽城裏見秋風。欲作家書意萬重。復恐匆匆說不盡。行人臨發又開封。
行人猶未有歸期。萬里初程日暮時。惟愛門前雙柳樹。枝枝葉葉不相離。
長溪新雨色如泥。野水陰寒盡向西。楚客天南行漸遠。山山樹裏鷓鴣啼。
數卷新遊蜀苑詩。長安僻巷得相隨。草堂雪夜攜琴處。況是青城館裏時。
不覺六月初八日。還是去年瓜熟時。鞭藉竟誰能致曲。定自昭昭終可期。

訪瑄上人值吃葱茶

軟火明窗紙帳低。一聲初報午來雞。葱茶未必能留坐。爲愛高人手自提。

七夕

銀漢風休月對絃。靈橋長挂罷星填。從今祇恐期先老。無復佳期又隔年。

東山

南山不見見東山。白鷺時時自往還。爲問天公幾時雨。定因薄相故能慳。

閑坐

鴉銜遺乘趁饑鷹。老蚌時時傳喚噴聲。凡物有生皆有樂。不堪孤坐淚縱橫。

壬辰春試終場。王德循置酒。登月閣。邀丁希韓。甚歡。夜分方罷。
寶炷芬敷散瑞烟。月移花影上欄杆。角聲又報梅花弄。只恐歸時夜更寒。
清明日。淨因莊早飯罷。遂遊洪福。有懷巨載。元確。因致別約。

老禪期客煮園蔬。少憩西鄰日轉初。萬白千紅好時節。斷魂空付兩龍駒。
憶尋春色過何郎。西寺傳來墨有香。安得蒹葭真倚玉。再邀花影上迴廊。

同榮天和遊石城

樹密山深鎮雨涼。西州陳迹舊丹陽。相逢莫話當時事。且約清心感妙香。

謁錢公振李與幾

軟火明窗一炷香。歲交時節夜來霜。須知錢李饒風味。却媿巴歌污錦囊。

再過李欽之宅憶希武

客窗孤被探深寒。一夢從來已六年。獨有可人無復見。尊前談笑尙依然。

題李仲山金影軒

金影風光小洞天。藍橋有路隔雲烟。玉壺叩盡應能語。早晚光明照座邊。

題黃蘗泉

住庵老子不復見。傳法阿師追不回。飲水能知大恐意。一拳真是打爺來。

次韻贈答洪覺範并序

覺範以余有收成之行。作六字詩五首。敘別。既邂逅於崇。因遂出以相示。而句中謂余東坡客也。頗復推借浮實。舊章又有玉堂之約。因次韻。

念盡已知木偶。多聞早慰詩流。北海幸君知舉。東家未我爲邱。豈爲彌天蓋世。却來作戲逢場。可是因人爾耳。要非皆我堂堂。問舍求田底事。乘流遇坎方時。且向忙中作繭。敢從作者論詩。立玉無因再倚。坐荆偶此同班。老去誰開東閣。朝來空對西山。僂俯誰爲荆棘。崢嶸漫自波濤。休說花磚步日。且尋煙雨飛舠。

五言絕句

題畫扇

白頰饒春思。梅梢喜可知。聲聲催爛熳。定是雪晴時。

挽詞

東坡挽詞

從來憂患許追隨。末路文詞特見知。肯向虞兮悲蓋世。空慙賜也可言詩。炎荒不死疑陰相。漢水相招本素期。月窟星沉豈人力。暉光他日看豐碑。

石敏若挽詞

萬年風采屬當時。墮地能班世有兒。夢筆方傳符昔應。玉樓何事遽先期。無由負弩瞻前導。空歎騎鯨去不疑。老矣無從忘肉味。餘音猶幸接吹篳。

李希武挽詞

十年枯木不知春。每向尊前得可人。申叔共瞻雲外翼。元賓豈是轍中鱗。揚帆巨浸方期遠。摧輻窮途定有因。後學從誰識頭角。祇應遺稿是通津。

濮道甫挽詞

暮雨江邊寄一犁。多情鄰老共差池。平生意氣幾如俠。晚日詩書更有兒。社酒方期終歲樂。葵蕭俄感送人悲。紛紛窮達都歸盡。誰復聲名是舊時。倜儻胸襟孰可侔。生平行樂自優遊。坐聞更漏棊盤局。醉徹笙歌月滿樓。千頃田園常富足。幾朝冠蓋舊交遊。佳城今日悲埋玉。亙古傳名信不休。

郭功甫妻孫夫人挽詞

率已名無媿。成家德可尊。蘋蘩招壻婦。翰墨見兒孫。孰不承意訓。俱來哭寢門。詩人難再得。彤管負評論。

李府君挽詞

賣藥韓康伯。著書河上公。幻同聊復爾。緣散却歸空。獨有鄉人淚。難勝薤露風。我來嗟已晚。猶及想冥鴻。

弔王承議二首

崎嶇南北舊相聞。晚用羈縲託後塵。盜賊餘風如振槁。里閭和氣似深春。雀巢絕探終能斃。烏喙雖長自不伸。所去見思猶可想。九泉齋恨彼何人。
征西墓上木成圍。伯氏傳孤出更奇。卓蓋朱輪誰不擁。青天白日晚方知。功名不掛非由種。賄賂終辭信有兒。空指丹青訪陳迹。倦懷猶恨得君遲。

附錄

李端叔真贊

龍眠居士畫

東坡

須髮之拳然。眉宇之淵然。披胸腹之欣然。以爲可得而見歟。則漠乎其無言。以爲不可得而見歟。則已見畫於龍眠矣。嗚呼。其將爲不雨之雲。以抱其全乎。其將爲既琢之玉。以役其天乎。抑將遊戲此世。而時出乎兩者之間也。

夜直玉堂。攜李之儀。端叔詩百餘首。讀至夜半。書其後。

玉堂清冷不成眠。伴值難呼孟浩然。暫借好詩消永夜。每逢佳處輒參禪。愁侵硯滴初含凍。喜入燈花欲鬪妍。寄語君家小兒子。他時此句一時編。

贈別李端叔

我觀江南山。如身不受垢。憶食江南薇。子獨於我厚。在北思江山。如懷冰雪顏。千峯上雲雨。岑絕何由攀。當時喜文章。各有兒子氣。邇來領須白。有兒能拜起。讀書浩湖海。解意開春冰。成山更案牘。顧我醜邱陵。白玉著石中。與物太落落。涇渭相將流。世不名清濁。乞言既不易。贈言良獨難。古來得道人。挂舌屋壁間。牧羊金華道。載酒太元宅。支頤聽晤語。願君啄三尺。我行風雨夜。船窗聞遠雞。故人不可見。故人心可知。

寄李端叔編修

少游

旗亭解手屢冬春。聞道歸來白髮新。馬革裹屍心未艾。金龜換酒氣方振。夢魂偷遠邊城月。導從公穿禁路塵。知有新編號橫槩。爲憑東使寄淮濱。

跋李端叔帖

端叔從故侯蘇公來鄉里。倡酬題記處處有焉。端叔亦自有蘇李同時之語。觀此書帖。撫事懷人。惘然久之。紹興癸丑八月朔。定武王安中履道題。